

Vorrede.

liche vnd gelehrte Männer haben/ durch welcher Weißheit der Gemein
nutz vnd Stattregiment geherrscht vnd gehandthabt werde.

Auß hochdringender not muß man auch allerley nutzbarliche Hand
werck/ Kunst vnd Gewerb haben/ vnd die Menschlich Gesellschaft
Kan derselbigen keines entzihen/ wie das allen verstendigen bekenn-
licher ist/ denn hiervon vil zu schreiben.

Auß disen vnd andern dergleichen vrsachen vil mehr/ auch vielent
vnrath vorzukommen/ muß ein solche vngleichheit (darvon wir dro-
ben gesagt) in Menschlichen Leben gewißlich seyn.

Derhalben sol ein jeglicher in seinem Stand/ Beruff oder Hand-
werck/ dareyn in Gott gesetzt/ wol zu frieden seyn/ vnd treuwlich darins
nen fortfahren/ in betrachtung/ daß auch der geringste/ vnd ärmeste
Mensch/ er sey was Wesens/ Wird/ oder Standts er wolle/ bey der
Göttlichen Maiestat nicht vergessen sey. Wie denn in diesem Büchlin
von allen Ständen/ Hohen vnd Niedrigen/ Geistlichen vnd Weltlichen/
Sachen (vermöge seines Inhalts) gründliche vnd eygentliche bes-
schreibung ist/ als von Keyser/ Königen/ Papst/ &c. Von den Hochge-
lehrten vnd iren gewöhnlichen Gradibus, vnd freyen Künsten/ von als-
lerley Handwercken/ vom größten bis zum kleinsten/ von anfang der
Welt her bis auff diese jetzige zeit/ so in Menschlichem leben nötig vnd
gebrenchlich seind/ sampt derselbigen vrsprung/ erfindungen/ vnd wei-
ter gelegenheit. Vnd seind vorwar diese Historien von erfindung aller
ding/ nicht allein lustig zu lesen/ Sondern bringen auch nicht geringen
nutz vnd erfahrung. Ich wil allein Exempels weise gantz kurtz anzey-
gen/ von wem die Buchstaben vnd die löbliche Kunst der Truckerey er-
funden seyen/ auff daß der günstig Leser vernemen möge/ was vnd
wie in diesem Büchlin/ von allen dingen/ Geistlichen vnd Weltlichen
Sachen/ tractiert oder gehandelt werde. Die alten Historien aber bes-
zeugen/ daß Cadmus/ etliche einer mit namen Mercurius/ die Buchsta-
ben erstlich erfunden hab/ Wiewol hiervon ein grosser streit ist bey den
Gelehrten/ welche solches andern auch/ die in erfindung der Buchsta-
ben ir bestes gethan/ zueygnen. Es sey aber demselbigen wie im wölle/
so ist es zwar ein vnaußsprechliche gutthat/ Sintemal allein durch
schreibens Kunst (dazu Buchstaben nötig) der gedechtniß beständig-
keit erhalten/ vnd alle ding zu gedenccken von nöten/ von schaden deß
vergeß errettet werden/ vnd vorzeiten/ als man der Truckerey geman-
gelt/ hat man alle Bücher abschreiben müssen/ vnd ehe das papyrmas-
chen auffkommen/ Dattel vnd Bircken Rinden hierzu gebraucht. Der-
halben ist dasselbig wie polydorus Vergilius spricht/ den Menschen ein
grosse gab gewesen/ aber keines wegs gegen diser zu vergleichen/ so wir
zu diser zeit vberkommen haben. Denn so jetziger zeit ein neuwe Ma-
tery zu schreiben erfunden ist/ wirt in einem tag so vil Schrift von ei-
nem